

Tuquitan ana čhjulumi želatča.

Yoozpankaz želatča, Yooz Ejp,

Yooz Majch, Yooz Espíritu Santo.

Nekztan Yoozqui tii muntu paachiča,

tii yoka y arajpacha.

Tuqui tjappacha zumchikaztača.

Nekztan Yoozqui kjana cjiskatchičha.

Kjanaqui majin cjichiča.

Zumchiqui ween cjichiča.

Nekztanaqui ween majin žejlča.

Jalla nii walipanž Yooz paatkalča.

Tii muntuquis ancha kjaz želatča.

Jakataž Yoozqui kjaz t'akziča,

tsewcchuc, kossuc.

Tsewcta kjaz tsjirquis žejlča.

Kosta kjaz chawjc kotquis žejlča.

Kosta kjazqui tii yokaž tjatnatča.

Imaž želatča kjoñ yokami.

Kattaž Yoozqui kjoñ yoka

pariskatchičha.

Nekztan jecchuc kjoñ yoka žejlča.

Nižaza Yoozqui paachiča,

pastu, kalu, munti, lujlz čhjeri,

tjapa ch'ojña pakñinaca.

Nuž walipanž Yooz paatkalča.

Niipataž Yoozqui paachičha,

tjuñi, jiis, warawara.

Majinqui tjuñiž kjančha.

Weenqui jiis warawaraž kjančha.

Nuž mantichičha Yoozqui.

Uwa niipataž Yoozqui tjapa wežlanaca

paachičha, parina, wallpa, kaza,

tjapa wežlanaca.

Nižaza kjazquis žejlñinaca paachičha, ch'iz,

ts'irka, tjapaman kjazquis žejlñinaca.

Nižtanaca Yoozqui paachičha.

Ancha uwa niipataž Yoozqui paachičha

tjapaman animalanaca, paku, kiti,

jwala, uuza, cuchi, querca, zkora,

tjapaman animalanaca.

Kolta animalanacami,

pajk animalanacami Yooz paatačha.

Nekztanac Yoozqui žoñizakaz paachičha.

Tii yok pjilquistan žoñi paachičha,

luctakžtan, maatakžtan.

Adán Eva cjitatačha nii žoñinacaqui.

Nekztan Yoozqui mantichičha:

--Lucutiñiž cjequičha ančhucqui.

Miraquiž ančhucqui.

Tamaž cjisnaquičha.

Sojta tjuñinacquisiqui nižtanaca

Yoozqui paachičha.

Tawkžtanpankaz tjappach čhjultakinacami  
paachičha.

Walika tjappacha paachičha.

Nekztan sojta tjuñi langžcu, pakallawk  
tjuñquis jeejzičha Yoozqui.

# ¿Ject Tii Muntu Paachi?

## ¿Quién Hizo el Mundo?

IMPRENTA INDIGENISTA BOLIVIANA

Casilla 1415  
Cochabamba, Bolivia  
Mayo 1968

200